

Gij Fungsug Baenzgya Yauzcuz

□ Maj Veiyungz comz hoiz



▲ Gvanbaz moq yien
fwngz hwnj ruz vaek maranz.



▲ Cejnuengx ndaw mbanj
doxbuenx soengq bae.



▲ Bawxmoq cangndang
gyaeunde yienhda.



▲ Aendoih soengq cin
foedfoed nanghnangh.



▲ Gyoengqvunz soengq
cin bae baiq miuh.



▲ Mbangj dieg caemh cauh ruz soengq cin.

Youq Cungguk, Yauzcuz dwg aen minzcuz vunz noix gig lauxgeq hix hojrox ndeu, gyoengqvunz Yauzcuz cawjdaez youq laeng diegbya Yinznanz, Guengsae, Huznanz, Guengjdoeng, Gveicouh youqdingh, liz hawsingz gyae, ndoengfaex mwncupcup, gij vwnzva de conzdungj, sengcingz dingz lai cungj lij ce miz. Ndawde, gij fungsug baenzgya couhdwg aen daegsaek hung ndeu. Doiq Bouxyauz ma gangj, haenx dwg aen laexsug baenz seiqvunz ceiq youqgaenj ndeu. Gij lizsij de nanzgyae, youh daegbied youh hojrox.

Gyonj hwnjdaej gangj, gak dieg Yauzcuz gij bouhloh baenzgya daih-gaiq cungj doxdoengz: Soengq cin, doiqfwen, daej haq, couxyah, baiq-dangz daengj. Bi 2018 ndwen 10, gyoengqvunz Yauzcuz daj Yangzsoz, Lungzswng, Yungjufuz, Fuconh, Bingzgei Gih, Bazbu Gih daej laeng Gveilinz Yungjufuz Yen camgya aen hozdung langhbaej gij fungsug baenzgya Yauzcuz hoenghwd ndeu, miz Yauzvaqbya, Yauzbingzgyaeuj, Yauzbingzdeih, Yauzdoj, Yauzbuenz, Yauzhoengz, Yauzva daengj gak nga Yauzcuz daej camgya hozdung. Gij fungsug baenzgya langhbaej daj ngoenzde gyanghaet 9 diemj cung

hainduj, guh baenz diemj lai cung cij sat, aen doih soengq cin miz 200 lai vunz, gyoengqde daenj buhvaq Yauzcuz, baez okdaej cix yinx hauj-lai hekyouz humxyawj.

Hoeng aenvih Yauzcuz faensanq youq gak dieg, doxliz gyae, ndigah gij fungsug baenzgya gyoengqde caemh lij miz di mbouj doxdoengz dem, lumjbaenz laej daizraez Hocouh, fwen buenxhaq Gunghcwngz daengj. Laej daizraez dwg Yauzdoj Hocouh aen daegsaek hung baenzgya ndeu, doenghbaez cungj yaek aeu gwn baenz song ngoenz sam hwnz cij ndaej, doeklaeng gaij baenz ngoenz ndeu hwnz ndeu, hoeng gij yizsij lij mbouj bienq. Gij daiz daengq laej daizraez dwg cienmonz aeu ma banh gij laej neix, aeu doenghgi benj 2 mij raez haenx doxdaep hwnjdaej, guh faj najdaiz 60 lizmij gvangq ndeu, baihlaj aeu daengqfaex daej daemxcengj, yienghneix couh dawz baenz faj baenz faj najdaiz lien hwnjdaej. Daengz gokvan hix van, daj ndaw ranzding nda daengz lajroq baihrog. Miz geijlai vunz daej gwn laej, aen daizlaej couh nda geijlai raez. Baez haeuj daiz, bouxcawj iu bouxhek naengh roengzma le, boux-laux ndaw coengcug couh ciengq

fwencouxhek, bouxcawj hix yiengq bouxhek gingqlaeuj. Sing fwen yiengj hwnjdaej le, couh mbouj rox daengx lo, gou dingz mwngz ciengq, mwngz dingz de ciengq. Bouxmbauq caeq dahsau doq ciengq doq nip byaek hawj bouxhek. Yienznaeuz haujlai bouxhek dingq mbouj rox gij fwen dwg eu gijmaz, hoeng daj gij riu angqyangz bouxcawj couh rox haenx dwg aen minzcuz gig yiedcingz, daihhek ndei, hix swnzsienh sim ndei ndeu.

Linghvaih, mbangj dieg laeng Gunghcwngz Yauzcuz Swciyen, baez miz dahsau yaek okhaq couh aeu eu fwen buenxhaq. Fwen buenxhaq caemh heuhguh golabva roxnaeuz gobuenxlaeuz. Bawxmoq lij caengz lizhai ranzmeh seiz, gyoengq caencik baengzyoux, bouxhek (baugvat gij vunz bouxsai daej cieq bawxmoq haenx) caiqliz bawxmoq swheij cungj youq aen ranzfwen ndaw ranz doiq fwen. Gij neihyungz fwenbuenxhaq dwg daegdingh he: Ciengq gij aencingz bohme, ciengq go mbouj sij hawj beixnuengx baengzyoux, ndaq aeuyah haqsau baubanh, ienq yahmoiz, gyo'mbaiq bouxhek cieq bawxmoq, fueng bouxsai caeq fueng bouxmbwk doxcam doiqciengq daengj. Gij doiqsiengq, neiyungz fwen mbouj doengz, gij cingzgamj couh riengz de hwnjhwnj roengz-roengz, bienq bae bienq dauq.

Gij daegsaek baenzgya Yauzcuz gig naek, dwg aendap Yauzcuz doxaeu, gyau baengzyoux, doxgyau vwnzva youqgaenj ndeu. Bi 2010, gij fungsug baenzgya Yauzcuz Hocouh Bazbu Gih caeq Gunghcwngz Yauzcuz Swciyen ndaej senj haeuj swcigih gaep buek daihsam feihvuzciz vwnzva yizcanj mingzloeg.



▲ Ram giuh haeuj rugmoq.



▲ Aen yizsij baiqdzangz
yiengh gingqcungh.